

25. Hoc ornatu indutus, coronam gerens, pannumque sericum, cui anserum figuræ intextæ erant, maxime adspectu dignus erat recens ille dignitatis regiæ maritus.

26. Cum ornatum suum in speculo aureo contemplaretur, umbra ejus splendebat, veluti sole orto arboris cœlestis umbra resplendet in *Merue* monte.

27. Comitibus ejus, qui manibus suis insignia regia gestabant, clamore eum salutantibus, ingressus est aulam regiam, ne *Sudharma* quidem inferiorem.

28. Ibi consedit in solio paterno, stragulo tecto, cujus scabellum reges gemmis in verticibus suis attigerant.

29. Splendebatque magna illa domus solemnis *ATITHE* ingresso, sicut *VISHNUIS* pectus, *Srīvatsæ* signo notatum, splendet per *Kaustubham* gemmam.

30. Juventute peracta, dignitatem regiam adeptus clarius etiam lucebat, veluti luna quæ, postquam lineæ instar apparuerat, ad plenitudinem pervenit.

31. Cives illum, qui sereno vultu benigneque ridens eos alloquebatur, quasi solatium putabant, corpore indutum.

32. Ille, *INDRÆ* prosperitate gaudens, elephanto vectus, *Airāvataæ* robore prædito, *Ayodhyam*, cujus vexilla arbores cœlestes referebant, cœlo similem reddidit.

33. Super ejus solius capite elata erat umbella, cujus puro splendore exstinguebatur dolor urens, quo regis prioris abitus universum mundum affecerat.

34. Ignis splendor non nisi post fumum conspicitur, solisque radii post ortum; ille vero, luminum illorum naturam transgressus, una cum virtutibus suis eluxit.

35. Eum prosequiebantur urbis mulieres, oculis gaudio fulgentibus, ut noctes stellam polarem sideribus, autumnus nitidis.

36. *Ayodhyæ* urbis dei, in templis egregiis culti, in imaginibus suis adstantes, eum, favore dignum, favore amplectebantur.

37. Ara sacra, inaugurationis aqua irrigata, nondum exaruerat, jamque splendor ejus invictus ad litora usque penetraverat.